

02/02/1999

Formula pemulihan PM bawa hasil positif

GEORGETOWN, Isnin - Malaysia tidak akan mampu mencapai ke tahap pemulihan ekonomi yang membanggakan jika kerajaan mengikut kehendak dan cara Datuk Seri Anwar Ibrahim.

Datuk Seri Abdullah Ahmad Badawi, berkata sebaliknya formula pemulihan ekonomi yang diilham dan dipertahankan Perdana Menteri, Datuk Seri Dr Mahathir Mohamad kini terbukti keberkesannya.

Timbalan Perdana Menteri berkata, malahan langkah memberangsangkan itu berupaya mengukuhkan semula kedudukan ekonomi negara hingga mengubah pandangan pakar ekonomi asing berhubung pendirian tegas Dr Mahathir itu.

"Kalau kita (kerajaan) ikut kehendak bekas Timbalan Perdana Menteri yang juga Menteri Kewangan, saya tidak tahu apa yang akan berlaku pada negara kita sekarang.

"Begitu juga, kalau kita terpengaruh dengan cemuhan, kritikan pedas dan pandangan parti pembangkang, media asing, Tabung Mata Wang Antarabangsa (IMF) dan pakar ekonomi antarabangsa, sudah tentu negara ini masih berada dalam keadaan kemelesetan," katanya pada majlis jamuan Aidilfitri anjuran Umno Bahagian Bayan Baru di Tapak Pesta Sungai Nibong dekat sini, hari ini.

Turut hadir isteri Abdullah, Datin Seri Endon Mahmood, Ketua Menteri, Tan Sri Dr Koh Tsu Koon, timbalannya, Datuk Mohd Shariff Omar dan Ketua Umno bahagian berkenaan, Umar Fauzan.

Abdullah yang juga Pengerusi Badan Perhubungan Umno negeri, berkata pencapaian ekonomi negara ke tahap memberangsangkan kini juga membuktikan kepimpinan BN mempunyai keupayaan untuk memulihkan ekonomi negara.

"Malahan, pakar ekonomi asing juga mengakui langkah yang diambil pucuk pimpinan negara meletakkan Malaysia sebagai negara yang mendahului negara jiran di rantau ini dalam usaha memulihkan kegawatan ekonomi," katanya.

Menurutnya, penyertaan Dr Mahathir di Forum Ekonomi Dunia di Davos, Switzerland baru-baru ini turut menjelaskan kepada dunia mengenai kedudukan Malaysia dalam usaha menangani isu kegawatan ekonomi terutama spekulator mata wang.

"Pihak yang menghadiri forum antarabangsa itu kini sudah tentu lebih jelas sebab utama negara kini melaksanakan langkah tertentu dalam usaha ke arah pemulihan ekonomi seperti kawalan mata wang negara.

"Penjelasan ini pasti akan menamatkan khabar angin yang menyatakan kerajaan Malaysia cuba bertindak mengawal dan mengasingkan negara ini dengan negara lain di dunia," katanya.

Malaysia sebenarnya akan terus memainkan peranan untuk memajukan ekonomi bukan saja di peringkat nasional, tetapi global.

Menurutnya, langkah yang dijalankan kini turut memberi keyakinan pelabur asing termasuk sektor perindustrian di Pulau Pinang untuk terus menjalankan kegiatan mereka.

(END)